

## პროექტი სვანეთი

სვანური კომუკები და სვანეთის მაღალი ხელოვნება  
ისტორია და ჰიპოთეზა

ანტიკურ პერიოდში და ადრეულ შუა საუკუნეებში სვანეთის ტერიტორიაზე გადიოდა როგორც ჩრდილო კავკასიისკენ, ასევე, შავი ზღვისაკენ მიმავალი სავაჭრო გზა: კოდორის ხეობის გავლით მოგზაურს ადვილად შეეძლო მიეღწია შავი ზღვის სანაპირომდე, სადაც ჯერ კიდევ ბერძნების დროს მათ მიერ აშენებული სავაჭრო ფორტები ეგულეობდა. სავაჭრო ფორტებიდან კი გახსნილი იყო საზღვაო გზა როგორც ცენტრალური ევროპისაკენ (დასავლეთით), ასევე ბიზანტიისაკენ (სამხრეთით) და შავი ზღვის ჩრდილოეთ სანაპიროზე მაცხოვრებელი ხალხებისაკენ.




ამიტომ ამ გზას, როგორც სავაჭრო და სამხედრო პოტენციალის მქონეს, დიდი მნიშვნელობა ენიჭებოდა. მე-6 საუკუნის ბოლომდე, ამ გზაზე კონტროლის მოსაპოვებლად, სპარსეთისა და ბიზანტიის სახელმწიფოებს შორის რამდენიმე ბრძოლა მოხდა. შესაბამისად, სავაჭ-

რო-სამხედრო გზის არსებობის გამო, მხარე მდიდარი იყო. ჰეროდოტეს ცნობით, სვანებს ამ პერიოდში 200 000-იანი ლაშქრის გამოყვანა შეეძლოთ. როგორც ჩანს, ამ ლაშქარში არა მარტო გზის გაყოლებაზე მცხოვრები სვანები, არამედ, ჩრდილო კავკასიაში მოსახლე ხალხიც ერთიანდებოდა.

მე-5 საუკუნეში დაწყებული რეგიონალური აციების გამო (ე.წ. „რომანული კლიმატური ოპტიმუმის დასასრული“), შავი ზღვისკენ მიმავალი გზა ჩაიკეტა (გზის ყველაზე მაღალი წერტილი, კოდორის უღელტეხილი, ზღვის დონიდან 2000 მეტრზეა). ასევე, კლიმატური პირობების გაუარესების გამო, გართულდა ჩრდილო კავკასიელ ხალხებთან ურთიერთობა. სვანეთი X საუკუნემდე არსებობდა, როგორც ჩიხი, სადაც მიმავალი გზა წყდებოდა და იმის იქით არსაით გრძელდებოდა.

X საუკუნეში კვლავ დაიწყო დათბობა (ე.წ. „შუა საუკუნეების თბილი პერიოდი“). ამ პერიოდში ჰაერის ტემპერატურამ ვერ მიაღწია რომანული კლიმატური ოპტიმუმის დონეს, შესაბამისად, კოდორზე გამავალი გზა შავი ზღვისაკენ ვერ აღდგა. სამაგიეროდ, ამ დათბობამ გაათავისუფლა ჩრდილო კავკასიაში გადასასვლელები, მყინვარებმა უკან დაიწიეს და აღდგა იმ გზების უმეტესობა, რომლებიც მე-6 საუკუნემდე ჩრდილო კავკასიას სვანეთთან აკავშირებდა.

**TEMPERATURE CURVE LAST FIFTEEN THOUSAND YEARS**



X საუკუნის ბოლოდან ქართველი მეფეები იწყებენ საქართველოს, როგორც რეგიონის უპირობო ლიდერის პროექტის განხორციელებას. ცხადია, ჩრდილო კავკასიაში მაცხოვრებელ ხალხთან ურთიერთობა, როგორც უსაფრთხოების, ასევე, ექსპანსიის მიმართულებით, მნიშვნე-

ნელოვანი იყო. სწორედ ამ დროს გაჩნდა სვანეთის, როგორც ჩრდილო კავკასიასთან ურთიერთობის მთავარი ფორპოსტის, იდეა და ამავე ხანას უკავშირდება სვანური კომპლექსების მშენებლობაც.

სვანური კომპლექსები აშენებულია ჩრდილო კავკასიიდან გადმოსასვლელების ძირში იმ გათვლით, რომ უღელტეხილებიდან ჩამოსულ ჯგუფს კომპლექსზე უნდა გაეგლო. თუკი ამ ჯგუფის მიზანი საომარი მოქმედება იყო, მათ პრაქტიკულად გადარჩენის შანსი არ ჰქონდათ.

სწორედ იმიტომ, რომ უღელტეხილებზე მხოლოდ უთოვლო პერიოდში შეიძლებოდა გადმოსვლა, სვანური კომპლექსები ააშენეს, როგორც საზაფხულო შენობები, გათბობის სისტემების გარეშე. სავარაუდოა, რომ მათი გამოყენება მხოლოდ უთოვლო პერიოდში ხდებოდა.

ის, რომ სვანეთი XII-XIII საუკუნეებში ვითარდებოდა, როგორც ჩრდილო კავკასიის მხრიდან დაცვის ზღუდე, მაგრამ, ამავე დროს, ჩრდილო კავკასიისაკენ საქართველოს სამეფოს ექსპანსიის ფორპოსტი, ამავე პერიოდში გამოყენებითი ხელოვნებისა და საკულტო მშენებლობების აღმავლობით და მაღალი ხარისხითაც დასტურდება: ამ პერიოდში არის შექმნილი მაღალი ხელოვნების ნიმუშები და აშენებულია ეკლესიების უმეტესობა.

სვანეთის დიდ მნიშვნელობას X-XIII საუკუნეების საქართველოსათვის ყველაზე კარგად ასურათებს ლატალის მაცხოვრის ეკლესიის დემეტრე I-ის (1125-1156) მეფედ კურთხევის ფრესკა, სადაც მეფეს სამეფო მახვილს სვანთა ერისთავი გადასცემს.



ასევე, ჯერჯერობით ერთადერთი პოლიტიკური პლაკატი-ხატი, სადაც წმინდა გიორგის მიერ ურჩხულის განგმირვის ცნობილი თემა გადათამაშებულია წმინდა გიორგის მიერ იმპერატორ დიოკლეტი-

ანეს (ჩვ. წ. 245-311) (ქრისტიანობის მოწინააღმდეგე იმპერატორის, რომლის დროსაც აწამეს წმინდა გიორგი) მოკვლის სცენად, სადაც წმინდა გიორგი გაერთიანებული საქართველოს მეორე მეფე გიორგი I-ზე (1014-1027), ხოლო დიოკლეთიანე, იმდროინდელი ბიზანტიის იმპერატორის, ბასილი II-ზე (976-1025) მიმთითებელ ნიშნებს ატარებს. სავარაუდოა, რომ ეს პლაკატი-ხატი არის რეაქცია ჩვ. წ. 1014-1023 წლებში საქართველოს და ბიზანტიის გართულებულ ურთიერთობაზე და ომზე (1021-1023), რომელიც ბიზანტიის გამარჯვებით დასრულდა.



*ჩრდილო კავკასიიდან ზემო სვანეთში არსებული 11 გადმოსასვლელი. ყოველი გადმოსასვლელის ძირას კოშკების კომპლექსებია განლაგებული.*

შესაძლებელია, ქართველი მეფეები ასე ცდილობდნენ ჩრდილო კავკასილი ხალხებისათვის მიზიდულობის ცენტრების შექმნას: მაღალი კულტურით/ტექნოლოგიებით მოხიბვლით და ქრისტიანობის გავრცელებით. ამ მოსაზრებას ადასტურებს ისიც, რომ ჩრდილო კავკასიაში ქართული ეკლესიები სწორედ ამ პერიოდშია (XI-XIII საუკუნეები) აშენებული.



მე-11 საუკუნის ქართული ეკლესია დათუნა დაღესტანში. წყარო:  
<http://www.batsav.com/pages/georgian-churches-north-caucasus.html>

სვანეთი XI-XIII საუკუნეებში ვითარდებოდა, როგორც ჩრდილო კავკასიიდან ქვეყნის დაცვის და, ამავე დროს, ჩრდილო კავკასიის მიმართულებით ქვეყნის საზღვრების გაფართოების ცენტრი. სვანეთის კოშკების ყველა კომპლექსი ამ პერიოდშია აშენებული. ამ პერიოდში აშენებული კოშკები შუა საუკუნეების არქიტექტურის ნიმუშებია არა მარტო იმის გამო, რომ არც ერთი კოშკი არ დანგრეულა მიწისძვრის ან ზვავის შედეგად, არამედ, მშენებლობის ტექნიკის გამოც: ზოგიერთი კოშკის ზედა მხარეც კი რამდენიმე ტონიანი ქვებითაა ნაშენები.

X საუკუნეში დაწყებული შუა საუკუნეების თბილი პერიოდი დასრულდა XIII საუკუნის ბოლოს, XIV საუკუნის დასაწყისში. უღელტეხილები კვლავ ჩაიკეტა. აციების ახალი პერიოდი XIX საუკუნის დასაწყისამდე გრძელდებოდა. შესაბამისად, დასრულდა და დავიწყებას მიეცა სვანეთის განვითარების ის პროექტი, რომლის შედეგებსაც – სვანურ კოშკებს, ეკლესიებს, მაღალი ხელოვნებით შესრულებულ ნატებს და ფრესკებს, იმდროინდელი მაღალი ტექნოლოგიის ნაშთებს – დღეს ვუყურებთ.



## ლიტერატურა

- ათანელიშვილი, გიორგი.** სვანეთის საკითხი ბიზანტია-ირანის დიპლომატიურ ურთიერთობაში: 562-590 წწ. – თბ.: საბჭ. საქართველო, 1959.
- არღვლიანი, ირაკლი.** ეთნოლოგიური ძიებანი: სვანეთი I [რედ.: თ. მიზრუანი]; ექვთიმე თაყაიშვილის სახ. საქ. საისტ. საზ. აფხაზეთის ორგანიზაცია, თბ., 2003.
- ბუხრაშვილი, პაატა.** წმინდა გიორგი – ღიღების მხედარი (გამოუქვეყნებელი), 2014.
- Crowley, Thomas J. and Lowery, Thomas S.** (2000). “How Warm Was the Medieval Warm Period?”. *AMBIO: A Journal of the Human Environment* 29: 51; Jones, P. D.; Mann, M. E. (2004). “Climate over past millennia”. *Reviews of Geophysics* 42 (2): 2002.
- Desprat, S., Goñi, M.F.S. and Loutre, M.F.** 2003. “Revealing climatic variability of the last three millennia in northwestern Iberia using pollen influx data”. *Earth and Planetary Science Letters* 213: 63-78. Röthlisberger, F. (1986), 10,000 Jahre Gletschergeschichte der Erde, Sauerländer.
- გასვიანი, გერონტი.** დასავლეთ საქართველოს მთიანეთის ისტორიის საკითხები: [სვანეთი] – თბ.: საბჭ. საქართველო, 1979.
- გასვიანი, გერონტი.** ნარკვევები შუა საუკუნეების სვანეთის ისტორიიდან [რედ.: გ. მარგინი]; საქ. მეცნ. აკად., ივ. ჯავახიშვილის სახ. ისტ. არქეოლოგიის და ეთნოგრაფიის ინსტ-ტი. – თბ.: მეცნიერება, 1991.
- გეგეშიძე, მიხეილ.** ბუნებრივი სტიქიები. განსახლებისა და დასახლების ფორმები (სვანური კომპლექსი). თბილისი. 1984.
- გელოვანი, არჩილ.** სვანეთის კულტურის ისტორიიდან / თბილ. ი. ჭავჭავაძის სახ. დ/ე და კულტურათა სახ. ინ-ტი. – თბ.: ეგრისი, 1998.
- ზემო სვანეთის თანამედროვე ყინვარები და ძველი გამყინვარების ნიშნები:** [სტატიების კრებული / ავტ.: გ. კურდღელაძე, შ. ინაშვილი, თ. ლაშხი, გ. კალანდაძე; სარედ. კოლეგია: თ. დავითაია (მთ. რედ.) და სხვა]; საქ. სსრ მეცნ. აკადემია. ვახუშტის სახ. გეოგრაფიის ინსტ-ტი. – თბ.: მეცნიერება, 1966.
- ინგოროყვა პავლე.** სვანეთის საისტორიო ძეგლები / საქ. სსრ მეცნ. აკად., ისტორიის ინსტ-ტი. – თბ.1941.
- კაკრიაშვილი, ნაპო.** უმგული-სვანეთის საქართველოს ევროპის სათავე თბილისი. უნივერსალი, 2010.
- კვიციანი, იოსებ.** სვანეთი II : (ეთნოლოგიური ძიებანი) / [რედ.: ვ. შამილაძე]. – თბ.: ენა და კულტურა, 2003.

- Patterson, William Paul.** Stable isotopic record of climatic and environmental change in continental settings, University of Michigan, 1995.
- სვანეთი** [სტატიების კრებული] / ს. ჯანაშიას სახ. საქ. სახელმწ. მუზეუმი, სვანეთის კომპლექსური შესწავლის კომისია – თბ.: მეცნიერება, 1977.
- ქალდანი, ანზორ.** კოშკების სამყაროში: [ზემო სვანეთის გეოგრაფიულ-ისტორიული მიმოხილვა]. – თბ.: საბჭ. საქართველო, 1978.
- ჩართოლანი, შოთა.** კოდორის ხეობის „დალ“-ის მხარის არქეოლოგიური ძეგლები = თბილისი. „მწიგნობარის“ გამ-ბა და სტ., 2010.
- ჩართოლანი, შოთა.** მასალები სვანეთის არქეოლოგიისათვის / ივ. ჯავახიშვილის სახ. ისტორიის, არქეოლოგიისა და ეთნოგრაფიის ინსტ-ტი. – თბ.1976.
- ჩართოლანი, შოთა.** ძველი სვანეთი / [რედ.: ო. ჯაფარიძე]; საქ. მეცნ. აკად. არქეოლ. კვლევის ცენტრი. – თბ.: კერა XXI, 1996.
- ხარაძე, რუსუდან.** სვანეთის სოფელი ძველად / საქ. სსრ მეცნ. აკად. ივ. ჯავახიშვილის სახ. ისტორიის ინსტ-ტი. – თბ.: საბჭ. საქართველო, 1964.